



ISLAONLINE

EDICION DIA DI BETICO

Noticia Transparente di Gobierno

Dialuna 22 Januari 2024

Email: IslaOnline@gobierno.aw Tel: 528-4952

25
JAN

DIA DI BETICO

SPECIAL PA NOS MUCHANAN

Mayornan por print e ultimo pagina
pa nos muchanan kleur mientras bo
ta conta nan e storia di Betico.



BETICO,
E LIDER STIMA
PA SU PUEBLO



STABILIDAD
Y
PROSPERIDAD

2 0 2 4



**Durante bishita di emabahadora di
Reino na Washington y di Consul
General di Reino na Miami**

**GOBIERNO A ORGANISA
UN ENCUENTRO CU
SECTOR PRIVA NA TASTE
MY ARUBA**

**“Nan ta sumamente impresiona
cu e maneho di Gobierno y nos
recuperacion”**

Embahadora di Reino na Washington, señora Birgitta Tazelaar y Consul General di Reino na Miami señora Lisette den Breems ta na Aruba pa un bishita pa cera conoci cu Gobierno di Aruba y haya un miho conocimiento di e vision general di Gabinete Wever-Croes, con pa traha mas hunto y kico ta e oportunidadnan cu nan ta mira pa Aruba na Merca.

Diahuebs anochi, den conexion cu e bishita, Minister di Asunto Economico, Comunicacion, y Desaroyo Sostenibel Geoffrey Wever, a organisa un encuentro cu sector priva na Taste My Aruba. E meta di e encuentro aki cu sector priva ta pa e Consul General y Embahadora scucha di nan banda tambe, nan idea y sugerencianan di e oportunidadnan cu por tin.

Durante e pandemia, nos a realisa cu Aruba no por ta dependiente solamente di un pilar economico, y p’esey pa 2024, Aña di Stabilidad y Prosperidad, diversificacion di e economia, pa Gobierno di Aruba ta un prioridad. Pa logra esaki, Gobierno mester por conta cu sector priva y probecha di tur oportunidad cu tin den Merca.

“Tanto e embahadora y e consul general na Miami ta sumamente encanta cu Aruba y nan ta sumamente impreciona di e maneho cu Gobierno a hiba durante Covid y con lihe Aruba ta recuperando y e ambicionnan cu nos tin pa sigui crece”, Prome Minister Evelyn Wever-Croes a expresa. ■



Prome Minister Evelyn Wever-Croes: Betico, e Lider stima pa su pueblo

SU AMOR PA SU PUEBLO TA HACI CU AWE SU PUEBLO TA STIM'E Y RECORD'E COMO UN GRAN ARUBANO

"Mi no ta un tata di un famia, cu ta consisti di homber y muhe y yiunan. Mi ta un tata particular, tata di un famia grandi, tata di un pueblo, nos pueblo di Aruba."



25 di januari ta un fecha special pa Aruba. Un dia nacional na unda nos comunidad por goza di un dia liber. Un dia na unda nos ta recorda e fecha natalicio di nos Libertador Gilberto François Betico Croes kende, si ta na bida, lo a haci 86 aña. E amor incondicional di Betico Croes pa un pueblo, su boluntad pa haci un sacrificio personal pa beneficia su pueblo, su accionnan incansable pa salba su pueblo, su bondad legitimamente compasivo pa su pueblo, su corage pa enfrenta forsan grandi pa su pueblo, su noblesa pa sirbi su pueblo, ta haci cu awe su pueblo ta recorde como un heroe, como un tata, como un libertador.

Gilberto François Croes, miho conoci como Betico, a nace dia 25 di januari di e aña 1938 den un famia humilde na Santa Cruz. Su tata tawata Fransisco miho conoci como Panchico, y su mama tawata Mimita Croes-Lopez. Hunto nan tawata tin 11 yiu. For di mucha, Betico tawata hopi stima pa esnan rond di dje. E tawata gusta yuda otro. Betico tawata yuda Pastoor tambe como misdinaar. Algo sigur cu ta di remarca ta cu for di hoben caba, tawata bisto cu Betico un dia lo bira un lider.

Betico a asisti scol basico St.Jozef School na Santa Cruz. Awendia e scol aki yama Colegio San Hose. Despues Betico a bay St. Dominicus College, na unda el a termina su H.B.S. Na aña 1954 pa 1958 Betico a bay Kweekschool na Hulanda na unda el a studia pa maestro di scol. Na Hulanda Betico no a perde oportunidadnan pa demonstra su calidad di bira un lider y tawata activo den diferente organisacionnan social Antiyano y tambe tawata organisa reunionnan pa studiantenan Arubiano y Antiyano na Hulanda.

Despues di su estudio, Betico a regresa Aruba y a traha na St.Jozef School como maestro, e mesun scol unda cu el a bishita como alumno. Y despues, Betico a bay traha na MAVO St.Antonius College na Santa Cruz, cu awo ta Colegio San Antonio.

Na Aña 1962, Betico, cu 24 aña, a drenta enlace matrimonial cu señora Glenda Croes di cua matrimonio a sali 4 yiu, Guisette, Glenbert, Junior y Glendeline. Yiunan, cu na un tempran edad, a biba sacrificio di nan tata pa su pueblo. Betico a sacrifica su famia, su yiunan pa e por traha pa e pueblo di Aruba. Palabranan inolvidabel cu Betico Croes a uza, di Omar Torijos di Panama, ta duna honor na e sacrificio aki: "E felicidad cu mi ta desea pa mi propio yiunan, ta e felicidad cu mi ta desea pa henter e pueblo di Aruba".

Na 1967, Betico a drenta e arena politico riba lista di AVP. Como politico hoben, Betico a bin cu cambionan den politica. E tawata posee un deseo grandi pa uni e pueblo y pa Aruba haya su autonomia. Betico a fungi como diputado pa algun aña y a bandona e partido AVP despues di a wordo inspira pa funda su propio partido.

Dia 9 di februari 1971, Betico a funda Movimiento Electoral di Pueblo MEP y su popularidad den pueblo a crece mas y su lucha a bira mas ferviente pa lucha pa realisa e causa di su pueblo. Betico a bira e lider mas stima di Aruba. Pakico su pueblo ta stim'e?

Betico tawata amigo di pueblo, hende di tur hende. Su lucha pa logra libertad di nos pueblo tawata incansabel. Betico Croes tawata un luchador pa su pueblo. Y ta su noblesa pa realisa libertad di nos pueblo, awe ta haci cu Aruba ta stima Betico Croes.

Den number di Gobierno di Aruba, Prome Minister Evelyn Wever-Croes ta invita comunidad di Aruba pa asisti na Manifestacion Cultural diaranson 24 di januari, 8or pa 10.30 anochi na Plaza Libertador GF Betico Croes y pa Ceremonia Protocolar diahuebs 25 di januari, 9or pa 10.30 di mainta na Plaza Libertador GF Betico Croes. Tambe lo tin diferente actividadnan den barionan di Aruba. Pabien Aruba cu Dia di Betico. "Ban celebra e dia aki na grandi. Disfruta di nos programa dedica na e pueblo pa hunto nos recorda e lucha di Betico."

Prome Minister Evelyn Wever-Croes:
Cuminsando e gran siman di celebracion di Dia di Betico
PROME MINISTER A BISHITA SCOL BASICO
XANDER BOGAERTS




Dialuna mainta, 22 di januari, Prome Minister Evelyn Wever-Croes a bishita Scol Basico Xander Bogaerts na San Nicolas. Prome Minister a haya un caluroso bonbini di alumnonan di klas 6 hunto cu cabesante Sra. Nadia Maduro.

Tawata un mainta hopi agradabel y e alumnonan tawata bastante critico y a haci hopi pregunta y a muestra cu nan sa hopi di Betico. Nan ta hopi involvi den nan comunidad y nan a expresa nan deseo di loke nan kier pa San Nicolas y con nan ta mira e desaroyo di pais Aruba. Tambe nan a expresa algun preocupacion grandi cu nan tin entre otro desempleo, ciudadanonan ambulante y personanan indocumenta.

Prome Minister a gradici cabesante sra. Nadia y e docentenan pa e bunita mainta aki alabes a gradici nan pa e bunita trabou cu nan ta haci pa nos muchanan. “Mi ta felicita specialmente e muchanan aki pa asina tanto cos cu nan sa di Betico su bida, su lucha, logronan y sacrificionan. Nos tur tin un poco di Betico den nos y entre nan tambe tin lidernan futuro di nos pais Aruba”.

Cabesante sra. Nadia Maduro tambe a tuma e oportunidad pa gradici Prome Minister Evelyn Wever-Croes pa e bishita y na e mesun momento a duna un “pluimpje” na e docentenan pa e preparacion di e alumnonan y a gradici e comision di nan scol cu e celebracion di Dia di Betico cu lo tuma lugar den grandi riba Diaranson 24 januari. ■





**Prome Minister Evelyn Wever-Croes:
Relaciona cu e celebracion di Dia di Betico:**

PROME MINISTER A DISFRUTA DI UN MAINTA SUPER INTERACTIVO CU ALUMNONAN DI COLEGIO SAGRADO CURASON NA SAVANETA

Drentando e siman pa cu celebracion di Dia di Betico, Prome Minister Evelyn Wever-Croes ta continua cu su bishitanan na scol. Dialuna mainta a toca turno na Colegio Sagrado Curason na Savaneta. Durante su bishita, Prome Minister a bishita Klasnan 6A y 6B, cu a duna un bunita presentacion di e dia special aki. E alumnonan a cuminsa nan presentacion cu un video di tur loke Betico a haci den su bida, sigui pa un presentacion sumamente bunita y emocional, cu Prome Minister a indica di a causa un gran impresion riba su persona.

Prome Minister a expresa di ta sumamente contento pa mira con hopi e alumnonan aki sa di e bida di Betico, y di su banda a splica nan cu Betico, ora e tabata tin nan edad, tambe tabata tin e deseo y soñonan cu cada un di nan tin awe, y cu ta na grandi el a logra cosnan grandi pa Aruba.

Na su turno cabesante di scol Juffrouw Lillith Rasmijn a indica di ta sumamente contento, y ta gradici Prome Minister pa bishita nan scol, y pa duna e alumnonan di klas 6 un bunita presentacion.

"Mi ta gradici e cabesante di scol, e docentenan di klas 6 Juffrouw, Carolina, Juffrouw Charlotte, y Juffrouw Michelle pa un mainta super interactivo, y tur e alumnonan pa un bunita presentacion. Mi ta sumamente orguyoso pa wak con prepara cada alumno ta, y ta spera cu cada un di nan tambe por logra, mescos cu Betico, cosnan grandi pa pais Aruba," Prome Minister a expresa. ■■■■





ARUBA TA CONSIDERANDO PA HABRI FRONTERA CU VENEZUELA E AÑA AKI

Frontera cu Venezuela ta cera desde aña 2019, na momento cu Gobierno di Venezuela a cera e frontera unilateralmente. Na mei di 2023 a habri e frontera maritimo basa riba palabracionnan haci entre autoridadnan di Aruba y autoridadnan di Venezuela.

E diferente instancianan na Aruba desde e momento ey, a cuminsa prepara pa habri e frontera aereo y ta spera cu den prome kwartaal di 2024 lo por duna un indicacion ki dia e frontera aereo lo habri.

E reunionnan ta tumando luga caba, pa por sigura un reapertura sigur y na forma responsabel. Mientras tanto e ciere di frontera a wordo prolonga cu 3 luna mas entrante 23 di januari 2024, pa por finalisa e preparacionnan.





MINISTER DI ADULTO MAYOR TA FIRMA MOU CU XAVIER UNIVERSITY PA ELEVA CALIDAD DI CUIDO PA NOS ADULTONAN MAYOR

Durante ultimo lunanan Minister Arends a bin ta tene diferente reunion cu Xavier University ariba e topico di adulto mayor. Un di e desaroyonan cu a sali di e conbersacionnan aki ta cu awe Gobierno di Aruba ta firma un MoU (Memorandum of Understanding) hunto cu Xavier University unda ta compromete pa hunto haci avanse den educacion, innovacion y estudionan pa loke ta trata cuido pa nos adultonan mayor.

E colaboracion lo encera cu Xavier University lo ofrece programa di certificacion pa esnan cu ta provee cuido pa adulto mayor pa asina eleva e calidad di esaki den casnan di cuido. Un inicio pa haci un impacto berdadero y cumpli cu nos adultonan mayor.

Ministerio di Asuntonan di Adulto Mayor ta abordando e desafionan cu adultonan mayor ta enfrenta y ta sigui enfoka riba solucion. Durante Foro Nacional 2023 a ricibi aporte di tur stakeholders pa por a yega na un convenio, un compromiso pa finalmente cuminsa na traha hunto pa asegura e bienestar di adulto mayor.

Na maart lo tuma luga e Foro Nacional 2024 unda e comite 'Foro Adulto Mayor' lo presenta nan consehonan cu stapnan concreto cual ta inclui aporte di varios stakeholders. "Tur hende riba e mesun liña, cu e mesun meta, creando un futuro unda nos adultonan mayor por disfruta di nan embehecimiento cu e sosten, compasion, y avansenan di un comunidad cu ta balora nan," segun Minister Ursell Arends.

Palabra di gradicimento na Xavier University pa reconoce e importancia den cuido di adulto mayor y ta premira un colaboracion fructifero. ■■■



Minister Ursell Arends: PROYECTO DI AGROFORESTERIA NA SCOL A LANSA NA SCOL BASICO WASHINGTON

Diasabra 20 di januari a ranca sali cu e proyecto di agroforesteria na scol basico bou encargo di Ministerio di Naturalesa. Scol Basico Washington tabata e prome scol basico cu a haya nan hardin di alimentacion.

Cu esfuerso di docente, mayornan, alumnonan y miembronan di comunidad a logra arma e hardin di alimentacion den oranan di mainta y atardi. Durante e dianan prome, miembronan di comunidad y alumnonan a trece diferente mata y simiya, entre otro, yambo, sorsaca, shimarucu, pinda y banana.

“Mi ta orguyoso di e bunita iniciativa aki y mi ta sigur cu nos lo wak e fruta di cosecha den e desaroyo di nos muchanan”, segun e mandatario Ursell Arends kende ta encarga cu sector primario. Cu e hardin aki, alumnonan tin e oportunidad pa siña di agricultura no solamente den teoria si no den practica tambe. Pues e meta di e proyecto aki ta pa inculca habitonan cu lo yuda nos fortalece e sector y crea un pilar economico adicional den futuro.

Minister Ursell Arends ta duna un danki di curason na un y tur cu a bin yuda. Un danki tambe na Santa Rosa y Living Soil Aruba pa nan aporte inmenso na nos muchanan di scolnan basico.

Tur miembro di comunidad ta bon bini pa yuda cu e siguiente dia di plantamento diasabra 17 di februari 2024, 7AM te cu 1PM na Scol Primario Kudawecha. Bin forma parti di e bunita proyecto aki!





OTRO CELEBRACION UNICO DI DIA DI BETICO NA MANA

Diahuebs dia 25 di januari Museo Arqueologico Nacional Aruba (MANA) un bes mas lo habri su portanan gratis entre 10'or di mainta y 2'or di merdia pa celebra Dia di Betico. Bishitantenan por disfruta di diferente experiencia unico y nobo.

Por sigui trabou den progreso den Cas Dundun, incluyendo mueblenan y potretnan antiguo, panel cu pintura di Pandellis di paisahe di costa di San Nicolaas. Tin primicia di 4 documentario produci pa Rebecca Roos Productions pa MANA y financia door di UNOCA. Un ta trata epocanan historico di Aruba, basa riba pinturanan original di Ephraim Britten. Dos documentario ta explora historia di famia Ecury pa medio di "Mamachi" (mama di Dundun) y Helena Leon, matriarca di entre otro famia Ecury. E di cuater documentario tin Dada Picus como protagonista, kende a traha e mansion di Dundun Ecury. Hunto e documentarionan ta dura mas o menos 30 minuut.

E artista contemporaneo, internacionalmente reconoci y premia, Sharelly Emanuelson ta habri su instalacion 'Tene A' cu un 'performance' y 'sesionnan interactivo cu publico. Lo tin unicamente tres sesion cu Sharelly. E prome ta 10:30 y e ultimo ta 12:00. Cada session ta dura mas o menos 15 minuut. UNOCA ta sostene Sherelly su presentacion durante 2024 den MANA.

Bishitantenan por experiencia dos produccion audiovisual fascinante cu artista local Natusha Croes a desaroya. Esakinan a ser financia pa PBCCG y UNOCA. Bishitantenan por mira "Lama ta Caminda", cu ta trata e relacion di Rancho y Tera Firme. Den rembak ta presenta e produccion poetico audiovisual "AWA ta Bida". Natusha tambe lo presenta 3 performance entre 12 or y 13:00. Cada un ta dura mas o menos 5 minuut.

Espacionan pa presencia e performancen - presentacion teatral escena- ta limita. Tambe pa facilita fluho di publico ta pidi encarecidamente pa yama MANA na 582-8979 entre 8:30 pa 16:30 pa inskribi y sigura un luga.

Desaroyadora di "Conoce Bo Isla" lo bende tres buki di busca palabra/ crucigrama cu ta contene hopi informacion di nos dushi Aruba. Koor Amigonan di Hesus y Maria (AHM- koor) ta



percura pa actividadnan atractivo pa mucha y lo bende algun pasa boca y coi bebe pa nan recauda fondo.

Entrada pa MANA ta via e porta mahestuoso di Cas Dundun, e edificio central berde.

Bishitantenan por explora entre otro e hardinnan, e terasa riba prome piso y relaha den Fruteria. Bin sera conoci y disfruta di tur e tesoronan nobo cultural y permanente cu MANA ta ofrece nos comunidad. Haya sa mas di nos artistanan hoben, nos historia y nos cultura .





Ban Celebra Dia Di Betico na MANA

10a.m. – 2p.m.



Kids Corner



Presentacion di 4 mini documentario

- "Dada Picus"
- "Mamachi"
- "Helena Leon"
- "Aruba Timeline"



Sharelly Emanuelson:
Instalacion "Tene A"
Pa presentacion registra na 582-8979

Natusha Croes:
Experiencia sensorial "Awa ta Bida"
y performance





Bendemento di crucigrama
Conoce Bo Isla

Snacks y co'i bebe



En conexion cu Dia di Betico MINISTER MADURO A BISHITA MARIA GORETTI COLLEGE Y AYO KLEUTERSCHOOL

E siman aki ta duna inicio na preparacion pa celebra Dia di Betico, nos Libertador cu a lucha pa nos Status Aparte. Pa cu esaki, Minister Xiomara Maduro di Cultura a bishita Maria Goretti College y Ayo Kleuterschool pa asina scucha di nos propio muchanan con nan lo bay celebra e dia aki.

Na Maria Goretti College, henter e scol a sali pa duna Minister Maduro un bonbini. Durante e bishita aki, e mandatario a combersa cu e muchanan riba ken tabata Betico Croes y kico ela nifica pa nos Pais.

Despues di esaki, Minister Maduro a sigui pa Ayo Kleuterschool caminda cu ela haya e oportunidad pa combersa cu esnan di mas chikito riba e dia aki y tambe pa scucha for di nan con nan lo bay celebra e fecha natal di nos Libertador.

Minister Maduro ta gradici directora, docentenan, personal y tur alumno di Maria Goretti College y Ayo Kleuterschool pa e caluroso bonbini y pa e mainta ameno cu ela pasa cu nan.







MINISTER GEOFFREY WEVER A ORGANISA BUSINESS MIXER ENTRE EMBAHADOR DI REINO HULANDES NA MERCA Y COMERCIO LOCAL



Diahuebs, 18 di Januari, a tene un evento unda cu e Minister di Asuntonan Economico, Comunicacion y Desaroyo Sostenibel di Aruba, Geoffrey Wever, a organisa un Business Mixer entre e sector comerial di Aruba y representantenan di Reino Hulandes na USA. E evento a ser marca pa e presencia di embahador di Reino Hulandes na Washington, Birgitta Tazelaar. E embahador a ser acompaña pa Consul General di Reino Hulandes na Miami, Lisette Breems, y tambe minister plenipotenciario di Aruba na Washington, Zulema Dabian-Erasmus.

E evento a atrae atencion di representantenan di sector priva, kende a participa den dialogonan interesante cu e representantenan di Reino. Minister President, Sra. Evelyn Wever-Croes como tambe minister Geoffrey Wever ambos a hiba palabra, caminda a enfoca riba e exploracion di oportunidadnan economico y comerial nobo entre Aruba y Merca, y con Reino Hulandes a traves di e Consul of Embahada, cual ambos ta dispuesto pa yuda facilita esaki.

Cu e obhetivo di fomenta dialogo y colaboracion entre empresarionan y funcionarionan diplomatico, e anochi a revela dialogonan interesante y perspectivanan fresco riba cooperacion comerial.

E interaccion entre e invitadonan ta muestra di un entusiasmo real pa fortalece lasonan economico y crea alianzanan strategico. Tin oportunidadnan unico entre Aruba y USA y den colaboracion por traha na realisa esakinan. Exploracion di horizontenan nobo den comercio y sostenibilidad a keda subraya durante e evento.

Minister Wever a conclui e anochi cu un nota positivo, afirmando cu e dialogonan lo sigui ricibi apoyo pa segura cu e conexionnan estableci aki por florece den alianzanan duradero y exitoso cu por contribui na e futuro di Aruba den e arena comerial regional.

Minister Geoffrey Wever

Minister Geoffrey Wever:


PROME FASE DI SONDEO DI CARBON TRADING TA MUSTRA PROMETEDOR PA MODELO ECONOMICO SOSTENIBEL



Recientemente, Metabolic Foundation a completa e prome fase di un sondeo pa explora opcionnan accesibel pa carbon trading na Aruba. Den un paso notabel pa un modelo economico sostenibel y inclusivo, Minister Geoffrey Wever a laga investiga e beneficianan potencial di "carbon trading", un iniciativa clave den e Plan di Accion 2023-2025: Aruba su transicion pa un modelo economico sostenibel y inclusivo. E enfoke innovador aki ta dirigi pa analisa e oportunidadnan y bentaha di compra y benta di carbon credits na Aruba.

E sondeo tabata tin como meta pa determina cuanto CO2 credits (1 credit = 1 ton CO2) Aruba por produci (via diferente projectonan) y kico su balor por ta, tanto actualmente como den futuro pa asina por midi e factibilidad pa compra/bende esakinan cu individualnan y/of organisacionnan internacional.


Carbon trading ta basa riba e concepto cu individuonan of companianan responsabel pa polucion di CO2 por cumpra "carbon credits" di entidadnan cu ta contribui activamente na medio ambiente. E contribucion aki por ehempel ta pa medio di desaroya proyecto di panelnan solar, apoya reservanan



natural, of otro iniciativanan sostenibel cu ta sea reduci of elimina e emision di CO2.

Basa riba e resultadonan prometededor di e sondeo, a dicidi di pasa pa e siguiente fase. E fase aki tin como meta crea un proyecto piloto unda lo test e compra y benta di carbon credits den e mercado internacional. Lo hasi esaki por medio di explora diferente plataforma di carbon trading existente rond di mundo cu por wordo implementa na Aruba. E siguiente fase aki lo conta cu e experticio di Metabolic Foundation y otro partnernan cu tin e conocimiento necesario pa logra e metanan di e proyecto aki.

A largo plaso por uza carbon trading como un herment cu no solamente ta crea un modelo economico nobo, pero tambe ta contribui na un desaroyo mas sostenibel.

"E movimiento di Aruba pa carbon trading no ta solamente un strategia economico; e ta representa un compromiso pa un futuro mas sostenibel y responsabel, aliniando crecimiento economico cu cuido ambiental", minister Geoffrey Wever ta termina. 



DIRECTIVA DI UNIVERSIDAD DI ARUBA Y PROFESOR DI UNIVERSIDAD DI UTRECHT A DUNA UN AVANCE DI E PROYECTONAN DI UNIVERSIDAD DI ARUBA



Minister di Enseñansa y Deporte Endy Croes a reuni cu profesor di Universidad di Utrecht dr. Mirko Noordegraaf hunto cu directiva di Universidad di Aruba Sra. Sue-Ann Lee y Sra. Mieke Droog. Diaranson ultimo durante e reunion, a duna un avance di e proyectonan di Universidad di Aruba, entre otro, a entrega Minister Endy Croes e conseho positivo di NVAO (Nederlands Vlaamse Accreditatie Organisatie) di e Opleiding Bachelor Organization Governance Management (OGM).

Un otro topico cu a trata durante e reunion ta e programa di Master den Governance and Leadership, cual ta un estudio di dos (2) aña. E estudio aki ta conta cu 23 empleado di diferente organisacion di Aruba. Tambe, a duna un avance riba e Functiehuis. Nan ta repasando tur structura di Universidad di

Aruba y acopl'e cu e structura di salario. Tin diferente compania profesional ta dirigiendo Universidad di Aruba riba e parti aki. Ta premira cu lo tin cu rapport di esaki prome cu final di e aña 2024. Fuera di esaki, a dialoga brevemente di e gobernacion di Universidad di Aruba.

Por ultimo, a duna un avance di Maria Convent, cual ta un proyecto grandi cu Gobierno di Aruba hunto cu UNESCO y Leuven a inverti 5.5 milyon florin. E proyecto aki lo ta compelamente finalisa den e luna di mei di e aña aki. Pa finalisa, Minister Endy Croes ta indica cu e tabata un bon reunion, unda a trata diferente punto importante en cuadro cu Universidad di Aruba.

MINISTER ENDY CROES A REUNI CU E REPRESENTANTENAN DI STICHTING SOAZA UNDA A TRATA DIFERENTE PUNTO DI INTERES



Recientemente, Minister Endy Croes hunto cu Sra. Alexandra Tromp – Vrolijk a reuni cu Sra. Esther Kortram -Wilson, Sra. Mirugia Leocadia -Zink y Sr. Calix Ashby di Stichting Onderwijs van Advent Zending Aruba (SOAZA). Durante e encuentro, a trata diferente topico di interes, manera e modelo di scol cu Soaza ta brinda na comunidad di Aruba.

Soaza ta opera cu e sistema Americano pa e programanan di “Middle” y “High School” bou di 2 plataforma digital: Ideal School y Dawere International High School, cual ambos tin Cognia Accreditation. Tambe, e directiva di SOAZA a informa Mandatario di Enseñansa cu nan scol secundario tin un lista di espera. Pa acomoda e studentenan aki, SOAZA a indica cu e scol tin mester di 2 lokaal extra y ta desea planifica di awo pa



augustus con Gobierno di Aruba por yuda cu esaki. Sea ta cu un edificio bashi na San Nicolas of cu 2 modulair pa asina nan por agrega 2 klas adicional pa aloca e alumnonan.

Ademas di esaki, a trata un proyecto di innovacion unda cu e scol ta ricibi financiamiento. E proyecto aki ta yegando su final. A guia nan den e proceso con pa aplica pa ricibi financiamiento via DUOS. Finalizando, Minister Endy Croes a expresa cu e tabata un bon reunion, unda a cera conoci un poco mas di cerca cu otro, kico e scol aki ta significa y con nan ta prepara nan alumnonan.

A palabra cu lo keda den comunicacion cu otro pa e puntonan cu mester di atencion y percura pa hunto nos resolve esakinan prome aña escolar nobo. ■

COLEGIO CONRADO CORONEL A RICIBI BISHITA DI MINISTER ENDY CROES

En conexion cu e fecha natalicio di nos Libertador Betico Croes



Minister Endy Croes a inicia e siman di celebracion di Dia di Betico cu un bishita na scol basico Colegio Conrado Coronel. E mandatario di Enseñansa a ricibi un caluroso bonbini door di cabesante di e scol Sra. Lourdes Vries y cabesante suplente Sr. Franklin Dirksen. Despues di un reunion breve, Minister Endy Croes a bishita e alumnonan di klas 6, unda a comparti informacion di e historia, bida y logronan di Betico Croes. E meta di e bishita ta pa e alumnonan conoce un poco di e historia di e lucha cu Betico a hiba pa henter e Pueblo di Aruba pa por a logra e Status Aparte. Minister Endy Croes a pone enfasis cu dia 25 di januari no ta solamente un dia liber di scol, pero a splica e significado di e dia aki. Na final di e charla, Minister Endy Croes a haci e alumnonan pregunta y remarcabel ta cu nan tabata conoce caba diferente faceta di e historia di Betico, e lider stima pa su pueblo.

Cabesante di Colegio Conrado Coronel, Sra. Lourdes Vries a expresa di ta contento di a ricibi bishita di Minister Endy Croes na e scol. Sra. Vries a gradici Minister Endy Croes pa duna e alumnonan extra informacion di e historia di Betico Croes y e motibo cu ta liber dia 25 di januari, cual ta un dia pa nos celebra. Sra. Vries a indica cu e alumno- y docentenan a keda sumamente contento cu e splicacion cu nan a ricibi di e mandatario di Enseñansa, unda cu nan a ricibi extra informacion cu kisas cu tempo ta bay un tiki perdi, pero awe Minister Endy Croes a rebiba esakinan bek.

Minister Endy Croes ta gradici e cabesante di e scol Sra. Lourdes Vries, docente - y specialmente e alumnonan pa e bunita recepcion y pa un mainta asina ameno. Ban recorda y celebra Dia di Betico pa e herencia bunita cu el a laga atras, nos Status Aparte. Minister Endy Croes ta desea henter Pueblo di Aruba un feliz Dia di Betico!



MINISTER ENDY CROES HUNTO CU TEAM DI BIBLIOTECA NACIONAL ARUBA A CELEBRA DIA DI BIBLIOTECA



E aña aki Biblioteca Nacional Aruba (BNA) a celebra e di 31 edicion di Dia di Biblioteca. Dia 20 di januari 2023, ta Dia di Biblioteca. Diabierna ultimo, Minister Endy Croes a asisti na e gran celebracion na Biblioteca Nacional Aruba. Durante e atardi ameno, e mandatario di Enseñansa a duna un discurso, felicitando e personal di BNA. Tambe, a informa esnan presente tocante e trabounan realisa na BNA durante aña 2023 y elabora riba e proyectonan pa aña 2024. En conexion cu Dia di Biblioteca, e team di BNA a haci un recorrido rond di Aruba y a bishita diferente museo, entre otro, Museo Industrial na Watertoren, Terrafuse Art Gallery, Museo Arkeologico, Museo Cas di Mamachi y Museo di Avion Air Aruba.

Directora di BNA a duna un discurso y a gradici e mandatario di Enseñansa pa tur trabou desplega pa BNA. Sra. Britten a indica cu durante aña 2024 lo sigui pone atencion riba e trabounan di biblioteca y traha hunto pa mehora y amplia e servicio. Minister Endy Croes ta felicita directora Sra. Astrid Britten y e empleadonan di BNA pa e gran trabou cu nan ta eherciendo na BNA. Finalmente, Minister Endy Croes ta encurasha e comunidad di Aruba pa lesa buki. Conocemento ta indispensabel. Mas bo lesa, mas bo sa y mas bo sa, sabi bo ta!



PA NOS MUCHANAN



Gobierno di Aruba



Comision Celebracion Dianan Nacional

BETICO, E LIDER STIMA PA SU PUEBLO



25
JAN

DIA DI BETICO

@Aruba Dia di Betico 2024